

四庫全書

史部

欽定四庫全書

史部
華陽國志
目錄
卷二

詳校官編修臣李漢

侍讀臣孫球覆勘

總校官中書臣朱鈐

校對官助教臣胡子襄

謄錄貢生臣王時發

欽定四庫全書

史部九

華陽國志目錄

載記類

卷一

巴志

卷二

漢中志

卷三

蜀志

卷四

南中志

卷五

公孫述劉二牧志

卷六

劉先主志

卷七

劉後主志

卷八

大同志

卷九

李特雄壽勢志

卷十

先賢士女總讚論

卷十一

後賢志

卷十二

序志并益梁寧三州先漢以來士女名目錄

臣等謹案華陽國志十二卷晉常璩撰璩字
道將江原人李勢時官至散騎常侍晉書載
勸勢降桓溫者即璩蓋亦譙周之流也隋書
經籍志霸史類中載璩撰漢之書十卷華陽
國志十二卷漢之書唐志尚著錄今已久佚
惟華陽國志存卷數與隋志舊唐志相合蓋

猶舊本新唐志作十三卷疑傳寫誤也其書
所述始於開闢終於永和三年首為巴志次
漢中志次蜀志次南中志次公孫劉二牧志
次劉先主志次劉後主志次大同志大同者
紀漢晉平蜀以後之事也次李特雄壽勢志
次先賢士女總讚論次後賢志次序志并三
州士女目錄宋元豐中呂大防嘗刻於成都
此本前有嘉泰甲子李至序稱呂刻利缺觀

者莫曉所謂嘗博訪善本以證其誤而莫之
或得因撫兩漢史陳壽蜀書益部耆舊傳互
相參訂以決所疑凡一事而前後失序本末
舛逆者則考正之一意而詞旨重複句讀錯
雜者則刊而去之又第九卷末有丕附記稱
李勢志傳寫脫漏續成以補其闕則是書又
於殘缺之餘李丕為之補綴竄易非盡璩之
舊矣丕刻本世亦不傳今所傳者惟影寫本

又有何鏜漢魏叢書吳瑄古今逸史及明何
宇度所刊三本鏜瑄之本多張佳允所補江
原常氏士女志一卷而佚去蜀中士女以下
至捷為士女共二卷蓋丞本第十卷分上中
下鏜等僅刻其下卷也又惟後賢志中二十
人有讚其餘並闕丞本則蜀郡廣漢捷為漢
中梓潼士女一百九十四人各有讚宇度本
亦同蓋明人刻書好以意為刊削新本既行

舊本漸泯原書既不可覩字度之本從丕本
錄出此二卷偶存亦天幸也惟丕本以序志
置於末而字度本弁於簡端考丕序稱首述
巴中南中之風土次列公孫述劉二牧蜀二
主之興廢及晉太康之混一以迄於特雄壽
勢之僭竊以西漢以來先後賢人梁益寧三
州士女總讚序志終焉則序志本在後字度
不知古例始誤移之又總讚相續成文丕序

亦與序志並稱宜別為一篇而丕本亦割冠
各傳之首殊不可解殆如毛公之移詩序李
鼎祚之分序卦傳乎今姑從丕本錄之而附
著其改竄之非如右其張佳允所續常氏士
女十九人亦併從何鏜吳瑄二本錄入以補
璩之遺焉乾隆四十三年八月恭校上

總纂官臣紀昀臣陸錫熊臣孫士毅

總校官臣陸費墀

華陽國志原序

古者封建五等諸侯國皆有史以記事后世罷封建為郡縣然亦必有圖志以具述蓋以疆域既殊風俗各異山川有險要阨塞之當備郡邑有廢置割隸之不常至於一士之行一民之謠皆有不可殫者顧非筆之於書則不能也周官職方氏掌天下之地圖辨其邦國都鄙夷蠻閩貊五狄六狄之人民與其財用之數要至於九穀之所宜六畜之所產亦未常不佔畢而紀其詳況夫

環數千里之墜分城置邑殆踰數十中間時異事變往往裂為偏方霸國其理亂得失蓋有繫天下大數安可使放絕而無聞乎此晉常璩華陽國志之作所以有補於史家者流也予嘗攷其書部分區別各有條理其指歸有三焉首述巴蜀漢中南中之風土次列公孫述劉二牧蜀二主之興廢及晉太康之混一以迄於特雄壽勢之僭竊繼之以兩漢以來先後賢人梁益寧三州士女總讚序志終焉就其三者之間於一方人物尤致深

意雖侏離之氓賤俚之婦苟有可取在所不棄此尤足以弘宣風教使善惡知所懲勸豈但屑屑於山川物產以資廣見異聞而已乎本朝元豐間呂汲公守成都嘗刊是書以廣其傳而載褻荒忽刊缺愈多觀者莫曉所謂予每患此久矣假守臨邛官居有暇蓋嘗博訪善本以證其誤而莫之或得因撫兩漢史陳壽蜀書益部耆舊傳互相參訂以決所疑凡一事而先後失序本末舛逆者則考而正之一意而詞旨重複句讀錯雜者則刊

而去之設或字誤而文理明白者則因而全之其它旁
搜遠取求通于義者又非一端凡此皆有明驗可信不
誣者若其無所考據則亦不敢臆決姑闕之以俟能者
然較以舊本之訛謬大畧十得五六矣鋟木既具輒叙
所以冠於篇首好古博雅與我同志者願無以夏五郭
公之義而律之嘉泰甲子季夏朔眉丹稜李堽叔厘甫
謹序

欽定四庫全書

華陽國志卷一

晉 常璩 撰

巴志

昔在唐堯洪水滔天，鯀功無成，聖禹嗣興，導江疏河，百川蠲脩，封殖天下，因古九圍，以置九州，仰稟參伐，俯壤華陽，黑水江漢為梁州，厥土青黎，厥田惟下，上厥賦惟下，中厥貢璆鐵銀鏤，砮磬熊羆狐狸織皮，於是四奧既

宅九州道同六府孔修庶土交正底睿財賦成貢中國
蓋時雍之化東被西漸矣歷夏殷周九州牧伯率職周
文為伯西有九國及武王克商并徐合青省梁合雍而
職方氏猶掌其地辨其土壤甄其寶利起於秦帝漢興
高祖藉之成業乃改雍曰涼葺梁曰益故巴漢庸蜀屬
益州至魏咸熙元年平蜀始分益州巴漢七郡置梁州
治漢中以相國參軍中山耿黼為刺史 元康六年廣
漢益州更割雍州之武都陰平荊州之新城上庸魏興

以屬焉凡統郡一十一縣五十八洛書曰人皇始出繼地皇之後兄弟九人分理九州為九囿人皇居中州制八輔華陽之壤梁岷之域是其一囿囿中之國則巴蜀矣其分野輿鬼東井其君上世未聞五帝以來黃帝高陽之支庶世為侯伯及禹治水命州巴蜀以屬梁州禹娶於塗山辛壬癸甲而去生子啓呱呱啼不及視三過其門而不入室務在救時今江州塗山是也帝禹之廟銘存焉會諸侯於會稽執玉帛者萬國巴蜀往焉周武

王伐紂實得巴蜀之師著乎尚書巴師勇銳歌舞以凌
殷人倒戈故世稱之曰武王伐紂前歌後舞也武王既
克殷封其宗姬於巴爵之以子古者遠國雖大爵不過
子故吳楚及巴皆曰子 其地東至魚復西至夔道北
接漢中南極黔涪土植五穀牲具六畜桑蠶麻紵魚鹽
銅鐵丹漆茶蜜靈龜巨犀山雞白雉黃潤鮮粉皆納貢
之其果實之珍者樹有荔支蔓有辛蒟園有芳蒟香茗
給客橙葵 其藥物之異者有巴戟天椒竹木之殯者

有桃支靈壽其名山有塗籍靈臺石書邠山 其民質
直好義土風敦厚有先民之流故其詩曰川崖惟平其
稼多黍旨酒嘉穀可以養父野惟阜丘彼稷多有嘉穀
旨酒可以養母其祭祀之詩曰惟月孟春獮祭彼崖永
言孝思享祀孔嘉彼黍既潔彼儀惟澤蒸命良辰祖考
來格其好古樂道之詩曰日月明明亦惟其名誰能長
生不朽難獲又曰惟德實寶富貴何常我思古人令問
令望而其失在於重遲魯鈍俗素樸無造次辨麗之氣

其屬有濮實苴共奴獯夷蠻之蠻周之仲世雖奉王職
與秦楚鄧為比春秋魯桓公九年巴子使韓服告楚請
與鄧為好楚子使道朔將巴客聘鄧鄧南鄙攻而奪其
幣巴子怒伐鄧敗之其後巴師楚師伐申楚子驚巴師
魯莊公十八年巴伐楚克之 魯文公十六年巴與
秦楚共滅庸 哀公十八年巴人伐楚敗於鄆 是後
楚主夏盟秦擅西土巴國分遠故於盟會希與戰國時
嘗與楚婚及七國稱王巴亦稱王 周之季世巴國有

亂將軍蔓子請師於楚許以三城楚王救巴巴國既寧
楚使請城蔓子曰藉楚之靈克弭禍難誠許楚王城將
吾頭往謝之城不可得也乃自刎以頭授楚使王歎曰
使吾得臣若巴蔓子用城何為乃以上卿禮葬其頭巴
國葬其身亦以上卿禮 周顯王時楚國衰弱秦惠文
王與巴蜀為好蜀王弟苴私親於巴巴蜀世戰爭 周
慎王五年蜀王伐苴侯苴侯奔巴巴為求救於秦秦惠
文王遣張儀司馬錯救苴巴遂伐蜀滅之儀貪巴道之

富因取巴執王以歸置巴蜀及漢中郡分其地為二縣
儀城江州司馬錯自巴涪水取楚商於之地為黔中郡
秦昭襄王時白虎為害自秦蜀巴漢患之秦王乃重
募國中有能煞虎者邑萬家金帛稱之於是夷胸忍膠
仲藥何射虎秦精等乃作白竹弩於高樓上射虎中頭
三節白虎常從羣虎瞋恚盡搏煞羣虎大吻而死秦王
嘉之曰虎歷四郡害千二百人一朝患除功莫大焉欲
如要王嫌其夷人乃刻石為盟要復夷人頃田不租

十妻不算傷人者論敘人雇死倭錢盟曰秦犯夷輸黃
龍一雙夷犯秦輸清酒一鍾夷人安之漢興亦從高祖
定秦有功高祖因復之專以射白虎為事戶歲出實錢
口四十故世號白虎復夷一曰板楯蠻今所謂弔頭虎
子者也 漢高帝滅秦為漢王王巴蜀閬中人范目有
恩信方畧知帝必定天下說帝為募發實民要與共定
秦秦地既定封目為長安建章鄉侯帝將討關東實民
皆思歸帝嘉其功而難傷其意遂聽還巴謂目曰富貴

不歸故鄉如衣繡夜行耳徙封閬中慈鄉侯目固辭乃
封渡沔縣侯故世謂三秦亡范三侯也目復除民羅朴
咎鄂度夕龔七姓不供租賦 閬中有渝水實民多居
水左右天性勁勇初為漢前鋒陷陣銳氣喜舞帝善之
曰此武王伐紂之歌也乃令樂人習學之今所謂巴渝
舞也天下既定高帝乃分巴置廣漢郡 孝武帝又兩
割置犍為郡故世曰分巴割蜀以成犍廣也 自時厥
後五教雍和秀茂挺逸英偉既多而風謠旁作故朝廷

有忠貞盡節之臣鄉黨有主文歌詠之音巴郡譙君黃
仕成哀之世為諫議大夫數進忠言後遠避王莽又不
事公孫述怒遣使齎藥酒以懼之君黃笑曰吾不省
藥乎其子瑛納錢八百萬得免國人作詩曰肅肅清節
士執德實固貞違惡以授命沒世遺令聲 巴郡陳紀
山為漢司隸校尉嚴明正直西虜獻眩王庭試之分公
卿以為嬉紀山獨不視京師稱之巴人歌曰築室戴直
梁國人以貞真邪娛不揚目枉行不動身奸軌僻乎遠

理義協乎民 巴郡嚴王思為揚州刺史惠愛在民每當遷官吏民塞路攀轅詔遂留之居官十八年卒百姓若喪考妣義送者齎錢百萬欲以贍王思家其子徐州刺史不受送吏義崇不忍持還乃散以為食食行客巴郡太守汝南應季先善而美之乃作詩曰乘彼西漢潭潭其淵君子愷悌作民二親沒世遺愛式鏡後人 漢安帝時巴郡太守連失道國人風之曰明明上天下土是觀帝選元后求定民安孰可不念禍福由人願君奉

詔惟德日親 永初中廣漢漢中羌反虐及巴郡有馬
妙祈妻義王元愷妻姬趙蔓君妻華夙喪夫執共姜之
節守一醮之禮號曰三貞遭亂兵迫匿懼見拘辱三人
同時自沉于西漢水而没死有黃鳥鳴其亡處徘徊焉
國人傷之乃作詩曰關關黃鳥爰集于樹窈窕淑女是
繡是黼惟彼繡黼其心匪石嗟爾臨川邈不可獲 永
建中泰山吳資元約為郡守屢獲豐年民歌之曰習習
晨風動澍雨潤乎苗我后卹時務我民以優饒及資遷

去民人思慕又曰望遠忽不見惆悵嘗位徊思澤實難
忘悠悠心永懷 孝桓帝時河南李盛仲和為郡守貪財
重賦國人刺之曰狗吠何諠諠有吏來在門披衣出門
應府記欲得錢語窮乞請期吏怒反見尤旋步顧家中
家中無可與思往從鄰貸鄰人以言遺錢錢何難得今
我獨憔悴 漢末政衰牧守自擅民人思治作詩曰混
混濁治魚習習激清流温温亂國民業業仰前脩 其
德操仁義文學政幹若洛下閎任文公馮鴻卿龐宣孟

玄文和趙溫柔龔升侯楊文義等播名立事言行表世者不勝次載者也 孝安帝元初三年涼州羌反入漢中殺太守董炳擾動巴中中郎將尹就討之不克益州諸郡皆起兵禦之三府舉廣漢王堂為巴郡太守撥亂致治進賢達士貢孝子嚴永隱士黃錯名儒陳髦俊士張璠皆至大位益州刺史張喬表其尤異徙右扶風民為立祠 孝桓帝以并州刺史泰山但望字伯闇為巴郡太守勲卹民隱郡文學掾宕渠趙芬弘農馮尤墊

江龔祭王祈李溫臨江嚴就胡良文愷安漢陳禧閻中
黃閻江州母成陽譽喬就張紹牟存平直等詣望自訟
曰郡境廣遠千里給吏兼將人從冬往夏還夏單冬複
惟踰時之役懷怨曠之思其憂喪吉凶不得相見解緩
補綻下至薪菜之物無不躬買於市富者財得自供貧
者無以自久是以清儉天枉不聞加以水陸艱難山有
猛禽思迫期會隕身江河投死虎口咨嗟之歎歷世所
苦天之應感乃遭明府欲為更新童兒疋婦懽喜相賀

將去遠就近釋危蒙安縣無數十民無遠邇恩加未生
澤及來世巍巍之功勒於金石乞以文書付計掾史人
鬼同符必獲嘉報芬等幸甚望深納之郡戶曹史枳白
望曰芬等前後百餘人歷政訟訴未蒙感寤明府運機
布政稽當皇極為民庶請命救患德合天地澤潤河海
開闢以來今遇慈父經曰弈弈梁山惟禹甸之有倬其
道韓侯受命比隆等盛於斯為美永興二年三月甲午
望上疏曰謹按巴郡圖經境界南北四千東西五千周

萬餘里屬縣十四鹽鐵五官各有丞史戶四十六萬四千七百八十口百八十七萬五千五百三十五遠縣去郡千二百至千五百里鄉亭去縣或三四百或及千里土界遐遠令尉不能窮詰姦凶時有賊發督郵追案十日乃到賊已遠逃蹤迹絕滅罪錄逮捕證驗文書詰訊即從春至冬不能究訖繩憲未加或遇德令是以賊盜公行姦宄不絕禁等及隴西太守馮含上谷太守陳弘說往者至有劫閭中令楊殷終津侯姜昊傷尉蘇鴻彭

亭侯孫魯雍亭侯陳已殷侯樂普又有女服賊千有餘
人布散千里不即發覺謀成乃誅其水陸覆害煞郡掾
枳謝盛塞威張御魚復令尹尋主簿胡直若此非一給
吏休謁往還數千閉囚須報或有彈劾動便歷年更坐
踰科恐失冬節侵疑先死如當移傳不能待報輒自刑
戮或長吏忿怒冤枉弱民欲赴訴郡官每憚還往太守
行桑農不到四縣刺史行部不到十縣郡治江州時有
溫風遙縣客吏多有疾病地勢剛嶮皆重屋累居數有

火害又不相容結舫水居五百餘家承三江之會夏水漲盛壞散顛溺死者無數而江州以東濱江山險其人半楚姿態敦重墊江以西土地平敞精敏輕疾上下殊俗情性不同敢欲分為二郡一治臨江一治安漢各有桑麻丹漆布帛漁池鹽鐵足相供給兩近京師榮等自欲義出財帛造立府寺不費縣官得百姓懽心孝武以來亦分吳蜀諸郡聖德廣被民物滋繁增置郡土釋民之勞誠聖主之盛業也臣雖貪大郡以自優暇不忍小

民顛顛蔽隔謹具以聞朝議未許遂不分郡分郡之議
始於是矣哉 順桓之世板楯數反太守蜀郡趙溫恩
信降服於是宕渠出九穗之禾胸忍有連理之木光和
二年板楯復叛攻害三蜀漢中州郡連年苦之天子欲
大出軍時征役疲弊問益州計曹考以計畧益州計曹
掾程包對曰板楯七姓以射白虎為業立功先漢本為
義民復除徭役但出實錢口歲四十其人勇敢能戰昔
羌數入漢中郡縣破壞不絕若線後得板楯來虜彌盡

號為神兵羌人畏忌傳語種輩勿復南行後建寧

後漢作建

和二年羌復入漢牧守惶惶復賴板楯破之若微板楯

則蜀漢之民為左衽矣前車騎將軍馮緄南征雖授丹
楊精兵亦倚板楯近益州之亂朱龜以并涼勁卒討之
無功太守李顥以板楯平之忠功如此本無惡心長吏
鄉亭更賦至重僕役過於奴婢筮楚隆於囚虜至乃嫁
妻賣子或自剄割陳寃州郡牧守不理去闕庭遙遠不
能自聞含怨呼天叩心窮谷愁於賦役困乎刑酷邑域

相聚以致叛戾非有深謀至計僭號不軌但選明能牧
守益其資穀安便賞募從其利隙自然安集不煩征伐
也昔中郎將尹就伐羌擾動益部百姓諺云虜來尚可
尹將殺我就徵還後羌自破退如臣愚見權之遣軍不
如任之州郡天子從之遣太守曹謙宣詔降赦一朝清
戢獻帝初平元年征東中郎將安漢趙穎建議分巴
為二郡穎欲得巴舊名故白益州牧劉璋以墊江以上
為巴郡江南龐羲為太守治安漢以江州至臨江為永

寧郡朐忍至魚復為固陵郡巴遂分矣 建安六年魚復蹇胤白璋爭巴名璋乃改永寧為巴郡以固陵為巴東徙義為巴西太守是為三巴於是涪陵謝本白璋求以丹興漢髮二縣為郡初以為巴東屬國後遂為涪陵郡分後屬縣七戶二萬去洛三千七百八十五里東接朐忍西接蔣縣南接涪陵北接安漢德陽 巴子時雖都江州或治墊江或治平都後治閬中其先王陵墓多在枳其畜牧在沮今東突硤下畜沮是也又立市於

龜亭北岸今新市里是也其郡東枳有明月硤廣德嶼
故巴亦有三硤 巴楚數相攻伐故置扞關陽關及沔
關 漢世郡治江州巴水北有甘橘官今北府城是也
後乃還南城劉先主初以江夏費瓊為太守領江州都
督後都護李嚴更城大城周迴十六里欲穿城後山自
汶江通水入巴江使城為州求以五都置巴州丞相諸
葛亮不許亮將北征名嚴漢中故穿山不逮然造蒼龍
白虎門別郡縣倉皆有城嚴子農代為都督農解後梓

潼李福為都督 延熙中車騎將軍鄧艾為都督治陽

關 十七年省平都樂城常安 咸熙元年但四縣以

鎮西參軍隴西怡思和為太守二部守軍

江州縣郡治塗山有禹王祠及塗后祠北水有銘書詞

云漢初捷為張君為太守忽得仙道從此升渡今民曰

張府君祠縣下有清水穴巴人以此水為粉則膏暉鮮

芳貢粉京師因名粉水故世謂江州墮林粉也有荔枝

園至熟二千石常設厨膳命士大夫共會樹下食之縣

北有稻田出御米陂池出蒲蒻蘭席其冠族有波鉛母
謝然愷楊白上官程常世有大官也

枳縣郡東四百里治涪陵水會土地确瘠時多人士有
章常連黎牟楊郡冠首也

臨江縣枳東四百里接胸忍有鹽官在監塗二溪一郡
所仰其豪門亦家有鹽井又嚴甘文楊杜為大姓晉初
文立實作常伯納言左右楊宗符稱武隆人在吳為孫
氏虎臣也

平都縣蜀延熙時省大姓殷呂蔡氏

墊江縣郡西北中水四百里有桑蠶牛馬漢時龔榮以俊才為荊州刺史後有龔揚趙敏令德為巴郡太守淳于長寧雅有美貌黎夏杜皆大姓也

樂城縣在酉州江三百里延熙十七年省

常安縣亦省

巴東郡先主入益州改為江關都尉建安二十一年以胸忍魚復并羊渠及宜都與巫北井共六縣立為固陵

郡武陵康立為太守章武元年胸忍徐慮魚復蹇機以
失巴名上表自訟先主聽復為巴東南郡輔屏為太守
先主征吳於夷道還薨斯郡以尚書令李嚴為都督造
設圍戍嚴還江州征西將軍汝南陳到為都督到卒官
以征北大將軍南陽宗預為都督預還內領軍襄陽羅
獻為代蜀平獻仍其任拜凌江將軍領武陵太守 秦
始二年吳大將步闡唐咨攻獻獻保城咨西侵至胸忍
故蜀尚書郎巴郡楊宗告急於洛未還獻出擊闡大破

之闡咨退獻遷監軍假節安南將軍封西鄂侯入朝加
錫御蓋朝服吳武陵太守孫恢寇南浦安蠻護軍楊宗
討之退走因表以宗為武陵太守住南浦誘卹武陵蠻
夷得三縣初附民獻卒以捷為太守天水楊攸為監軍
攸遷涼州刺史朝議以唐彬及宗為代晉武帝問散騎
常侍文立曰彬宗孰可用立對曰彬宗俱立事績在西
不可失者然宗才誠佳有酒嗜彬亦其人性在財欲惟
陛下裁之帝曰財欲可足酒嗜難改遂用彬為監軍加

廣武將軍 迄吳平巴東後省羊渠置南浦 晉太康

初將巫北井還建平但五縣去洛二千五百里東接建平南接武陵西接巴郡北接房陵奴獍夷蠻之蠻民

魚復縣郡治公孫述更名白帝章武二年改曰永安咸熙初復有橘官又有澤水神天旱鳴鼓於傍即雨也

胸忍縣西二百九十里水道有東陽下瞿數灘山有大小石城並靈壽木鹽井靈龜咸熙元年獻靈龜於相府

大姓扶先徐氏漢時有扶徐荊州著石楚訪有弼頭

白虎復夷者也

著石楚訪四字未詳○弼其兩切又翹移切弼強貌又渠羈切又渠良切文一

重音

三

漢豐縣建安二十一年置在郡西北彭溪源

南浦縣郡南三百里晉初置主夷郡與楚郡接人多勁勇少文學有將帥材

涪陵郡巴之南鄙從枳南入折丹涪水本與楚商於之地接秦將司馬錯由之取楚商於地為黔中郡也漢後恒有都尉守之舊屬縣五去洛五千一百七十里東接

巴東南接武陵西接牂牁北接巴郡土地山險水灘人多
戇勇多獯蝥之民縣邑阿黨鬪訟必死無蠶桑少文學
惟出茶丹漆蜜蠟漢時赤甲軍常取其民蜀丞相亮亦
發其勁卒三千人為連弩士遂移家漢中延熙十三年
大姓徐巨反車騎將軍鄧芝討平之見玄猿緣其山
芝性好弩手自射猿中之猿子拔其箭筒卷木葉塞其創
芝嘆曰嘻吾傷物之性其將死矣乃移其豪徐蘭謝范
五千家於蜀為獵射官分羸弱以配督將韓蔣名為

助郡軍遂世掌部曲為大姓晉初移弩士于馮翊蓮勺
其人性質直雖徙他所風俗不變故迄今有蜀漢關中
涪陵其為軍在南方者猶存 山有大龜其甲可卜其
緣可作乂世號靈乂出涪陵縣郡治

丹興蜀時省山出名丹

漢平縣延熙十三年置

萬寧縣孝靈帝時本名永寧

漢髮縣有鹽井諸縣北有獯蠻又有蟾夷也

巴西郡屬縣七去洛二千八百一十五里東接巴郡南
接梓潼北接涼西城土地山原多平有牛馬桑蠶人自
先漢以來隗偉倣儻冠冕三巴及郡分後叔布榮始周
羣父子程公弘等或學兼三才或精秀竒逸其次馬盛
衡承伯才藻清妙龔德緒兄弟英氣矜然黃公衡應權
通變馬德信王子均勻孝興張伯岐建功立事劉二主
之世稱美荆楚乃先漢以來馮車騎范鎮南皆植斯鄉
故曰巴有將蜀有相也及晉譙侯脩文於前陳君煥炳

於後並遷雙固倬羣穎世甄在傳記縉紳之徒不勝次
載焉

閭中縣郡治有彭池大澤名山靈臺見文緯書識大姓
有三狐五馬蒲趙任黃嚴也

南充國縣和帝時置有鹽井大姓侯譙氏

安漢縣號出人士大姓陳范閻趙

平州縣其二縣為郡

宕渠郡延熙中置以廣漢王士為太守郡建九年省永

興元年李雄復置今遂為郡長老言宕渠蓋為故賈國
今有賈城盧城秦始皇時有長人二十五丈見宕渠秦
史胡母敬曰是後五百年外必有異人為大人者及雄
之王祖世出自宕渠有識者皆以為應之先漢以來士
女賢貞縣民車騎將軍馮緄大司農玄賀大鴻臚龐雄
桂陽太守李溫等皆建功立事有補於世緄溫各葬所
在常以三月二子之靈還鄉里水暴漲郡縣吏民莫不
於水上祭之其列女節義在先賢志

宕渠縣郡治有鐵官石蜜山圖所採也

漢昌縣和帝時置大姓勾氏

宣漢縣今省

右巴國凡分為五郡二十三縣

譔曰巴國遠世則黃炎之支封在周則宗姬之戚親故於春秋班倅秦楚示甸衛也若蔓子之忠烈范目之果毅風惇俗厚世挺名將斯乃江漢之含靈山岳之精爽乎觀其俗足以知其敦壹矣昔沙麓崩卜偃言其後當

有聖女興元城郭公謂王翁孺屬當其時故有政君李
雄宥渠之廝伍畧陽之黔首耳起自流隸君獲士民其
長人之魄良有以也

華陽國志卷一

欽定四庫全書

華陽國志卷二

晉 常璩 撰

漢中志

漢中郡本附庸國屬周赧王二年秦惠文王置郡因水
名也漢有二源東源出武都氐道漾山因名漾禹貢流
漾為漢是也西源出隴西嶠冢山會白水經葭萌入漢
始源曰沔故曰漢沔在詩曰滔滔江漢南國之紀其應

上昭于天又曰惟天有漢其分野與巴蜀同占其地東接南郡南接廣漢西接隴西陰平北接秦川厥壤沃美賦貢所出畧侔三蜀六國時楚強盛畧有其地後為秦恒成爭地漢高帝既克秦獲子嬰項羽封高帝為漢王王巴蜀三十一縣帝不悅丞相蕭何謀曰雖王漢之惡不猶愈於死乎且語曰天漢其稱甚美夫能屈於一人之下則伸於萬乘之上者湯武是也願大王王漢中撫其民以致賢人收用巴蜀還定三秦天下可圖也帝從

之都南鄭及項籍弑義帝高帝東伐蕭何常居守漢中
足食足兵既定三秦蕭何鎮關中資其衆卒平天下以
田叔為漢中守屬縣十一去洛一千九十一里叔既饋
以軍饗又致名材立宮室帝嘉之後為魯相然以帝業
所興不封藩王自叔之後世脩文教有倣儻之士異人
並挺鄧公抗言於孝景之朝以明忠枉之情張騫特以
蒙險遠為孝武帝開綠邊之地賓沙越之國致大宛之
馬入南海之象而車渠瑪瑙珊瑚琳碧屬賓明珠玳瑁

虎魄水精琉璃火浣之布蒲桃之酒筇竹藟醬殊方奇
玩盈於市朝振揚威靈被於幽裔遂登九列杖節繡衣
剖符博望谷口子真秉箕穎之操湛然岳立不營不求
德聲邁流楊王孫應至人之概 自建武以後羣儒修
業開按圖緯漢之宰相當出坤鄉於是司徒李公屢登
七政太傅子堅弈世論道其珪璋瑚璉之器則陳伯臺
李季子申伯之徒文秀瑋矚其州牧郡守冠蓋相繼於
西州為盛蓋濟濟焉 莽時公孫述據蜀跨有漢中當

秦隴之徑每罹於其害 安帝永初二年陰平武都羌
反入漢中煞太守董炳没畧吏民 四年羌復來太守
鄭廩出屯褒中欲與羌戰主簿段崇陳禪以為但可堅
守來虜乘勝其鋒不可當廩不從戰敗績崇與門下史
王宗原展及崇子勃兄子伯生力戰捍廩并命功曹程
信素居守馳來赴難冒寇殞歿廩虜遂大盛天子乃拜
巴郡陳禪為漢中太守虜素憚禪更來盤結禪知攻守
未可卒下而年荒民困乃矯詔赦之大小咸服既誅其

亂首天子善之徙禪左馮翊太守程信怨恥乃結故吏冠蓋子弟嚴孳李容姜濟陳已曹廉勾矩劉旌等二十五人誓志報羌各募壯士豫結同死以待寇太守鄧成命信為五官孳等門下官屬元和二年羌復來巴郡板楯救之信等將其士卒力奮討大破之信被八創二十五人戰死自是後羌不敢南向五年天子下詔褒歎信宗等賜其家穀各千斛宗展孳等家穀各五百斛列畫東觀每新太守到必先存問其家以羌畏服陳禪

拜禪子澄漢中太守 漢末沛國張陵學道於蜀鶴鳴山造作道書自稱太清玄元以惑百姓陵死子衡傳其業衡死子魯傳其業魯字公祺以鬼道見信於益州牧劉焉魯母有少容往來焉家 初平中以魯為督義司馬住漢中斷谷道魯既至行寬惠以鬼道教立義舍置義米義肉其中行者取之量腹而已不得過過多云鬼病之其市肆賈平亦然犯法者三原而後行刑學道未信者謂之鬼卒後乃為祭酒巴漢夷民多便之其供通

限出五斛米故世謂之米道扶風蘇固為漢中太守魯
遣其黨張脩攻固成固人陳調素遊俠學兵法固以為
門下掾說固守扞禦寇之術固不能用踰牆走投南鄭
趙嵩嵩將俱逃賊盛固遣嵩求隱避處嵩未還固又令
鈴下偵賊賊得鈴下遂得然固嵩痛憤杖劍直入調兵
聚其賓客百餘人攻脩戰死魯遂有漢中數害漢使焉
上書言米賊斷道 至劉焉子璋為牧時魯益驕恣璋
怒 建安五年殺魯母弟魯率巴夷杜濩朴胡袁約等

叛為讐敵魯時使使漢朝亦慢僑帝室以亂不能征就
拜中郎將漢寧太守不置長吏皆以祭酒為治民璋數
遣龐羲李思等討之不能克而巴夷日叛乃以羲為巴
西太守又遣楊懷高沛守關頭請劉先主討魯先主更
襲取璋二十年魏武帝西征魯魯走巴中先主將迎
之而魯功曹巴西閻圃說魯北降歸魏武贊以大事宜
附託不然西結劉備以歸之魯勃然曰寧為曹公作奴
不為劉備上客遂委質魏武武帝拜魯鎮南將軍封襄

平侯又封其五子皆列侯 時先主東下江安巴漢稽
服魏武以巴夷王杜濩朴胡袁約為三巴太守留征西
將軍夏侯淵及張郃益州刺史趙顛等守漢中遷其民
於關隴 二十四年春先主進軍攻漢中至定軍山郃
顛來戰大為先主所破將軍黃忠斬淵顛首 魏武
帝復西征先主先主曰孟德雖來無能為也我必有漢
川矣先主遂為漢中王將還成都當得重將以鎮漢中
衆皆以必張飛張飛心亦自許先主乃以牙門義陽魏

延為鎮遠將軍漢中太守先主大會羣臣問延曰今委卿以漢中卿居之若何對曰若曹操舉天下而來請為大王拒之若偏將十萬而來請為大王吞之衆壯其言初魏武之留淵郤也以雞肋示外外人莫察惟主簿楊脩知之故曰夫雞肋棄之如可惜食之無所以比漢中也 是後處蜀魏界固險重守自丞相大司馬大將軍皆鎮漢中 蜀平梁州治沔陽 大康中晉武帝子漢王迪受封更曰漢國郡但六縣

南鄭縣郡治周貞王十六年秦厲公城之有池水從旱山來入沔大姓李程趙氏

沔陽縣州治有鐵官又有度水水有二源一曰清檢二曰濁檢有魚穴清水出鱖濁水出鮒常以二月八日取蜀丞相諸葛亮葬定軍山

褒中縣孝昭帝元鳳六年置本都尉治也山名扶木有唐公房祠也

成固縣蜀時以沔陽為漢城成固為樂城

蒲池縣 西鄉縣

魏興郡本漢中西城縣 哀平之世縣民錫光字長沖
為交州刺史徙交趾太守王莽篡位拒郡不附莽方有
事海內未以為意尋值所在兵起遂自守 更始即阼
正其本官世祖嘉其忠節徵拜為大將軍朝候祭酒封
鹽水侯 後漢中數寇亂縣土獨存漢季世別為郡
建安二十四年劉先主命宜都太守孟達從秭歸北伐
房陵上庸自漢中又遣副軍中郎將劉封乘沔水會達上

庸以申耽弟儀為建信將軍西城太守達耽降魏 黃
初二年文帝轉儀為魏興太守封鄖鄉侯 蜀平遂治
西城屬縣六戶萬去洛一千七百里土地險隘其人半楚
風俗畧與荊州沔中郡同

西城縣郡治元康元年封越騎校尉蜀郡何攀為公國
也

錫縣 安康縣 興晉縣晉置

鄖鄉縣本名長利縣縣有鄖鄉

洵陽縣洵水所出

上庸郡故庸國楚與巴秦所共滅者也秦時屬蜀後屬漢中 漢末為上庸郡 建安二十四年孟達劉封征上庸上庸太守申耽稽服遣子弟及宗族詣成都先主拜耽征北將軍封鄖鄉侯仍郡如故 黃初中降魏文帝拜耽懷集將軍徙居南陽省上庸并新城孟達誅後復為郡屬縣五戶七千去洛一千七百里

上庸縣郡治 北巫縣 安樂縣咸熙元年為公國封

劉後主也

武陵縣 安富縣 微陽縣

新城郡本漢中房陵縣也秦始皇徙呂不韋舍人萬家於房陵以其隘地也漢時宗族大臣有罪亦多徙此縣漢末以為房陵郡建安二十四年孟達征房陵煞太守蒯祺進平三郡與劉封不和封奪達鼓吹關侯圍樊城求助于封達封達以新據山郡未可擾動為辭侯為吳所破殺達既忿封又懼先主見責遂拜書先主

告叛降魏魏文帝善達姿容觀以為散騎常侍建武
將軍襲劉封封敗走達據房陵文帝合三郡為新城以
達為太守後蜀丞相諸葛亮將北伐招達為外援故貽
書曰嗟乎孟子度邇者劉封侵陵足下以傷先帝待士
之望慨然永歎每存足下平素之志豈虛託名載策者
哉都護李嚴亦與書曰吾與孔明並受遺詔思得良伴
吳王孫權亦招之達遂背魏通吳蜀表請馬弩於文帝
撫軍司馬宣王以為不可許帝曰吾為天下主義不先

負人當使吳蜀知吾心乃多與之過其 sought 明帝太

和初達叛魏歸蜀時宣王屯宛知其情乃以書喻之曰

將軍昔棄劉氏託身國家委將軍以疆場之任任將軍

以圖蜀之事可謂心貫白日蜀人愚智莫不切齒於將

軍諸葛亮欲相破惟苦無路耳模之所言

郭模亮遣詐降洩孟達謀

者非小事也亮豈輕之而今宣露此殆易知耳達乃以

書與亮曰宛去洛八百去此千二百里聞吾舉事當表

上天子比相反覆一月間也則吾城已固諸軍足辦則

吾所在深險司馬公必不自來諸將來吾無患矣及兵
到達又告亮曰吾起事八日而兵至城下何其神速也
亮以其數反覆亦不救遂為宣王所誅滅宣王分為
三郡新城屬縣四戶二萬去洛一千六百里

房陵縣有維山維水所出東入瀘

瀘字疑誤
當作漢

沔鄉縣 昌魏縣 綏陽縣

右三郡漢中所分也在漢之東故蜀漢謂之東三郡蜀
時為魏屬荊州晉元康六年始還梁州山水艱阻有黃

金子午馬聰建鼓之阻又有作道九君搏土作人處而其記及漢中記不載又不為李雄所據璩識其大梗概未能詳其小委曲也

梓潼郡本廣漢屬縣也建安十八年劉先主自葭萌南攻州牧劉璋留中郎將南郡霍峻守葭萌城張魯遣將楊帛誘峻求共城守峻曰小人頭可得城不可得也帛退劉璋將向存扶禁由巴閬水攻峻歲餘不能克峻粟才八百人存衆萬計更為峻所破敗退走成都既定

先主嘉峻功 二十二年分廣漢置梓潼郡以峻為太守屬縣六戶萬去洛二千八百三十八里東接巴西南接廣漢西接陰平北接漢中土地出金銀丹漆藥蜜也世有雋彥人侔於巴蜀

梓潼縣郡治有五婦山故蜀五丁士所拽虵崩山處也有善板祠一曰惡子民歲上雷杼十枚歲盡不復見云

雷取去四姓文景雍鄧者也

一本作梓

涪縣去成都三百五十里水通於巴於蜀東北之要蜀

時大將軍鎮之有宕田平稻田孱水出孱山其源有金銀鑛洗取火融合之為金銀陽泉出石丹大司馬蔣琬葬此大姓楊杜李人士多見耆舊也

晉壽縣本葭萌城劉氏更曰漢壽水通於巴西又入漢川有金銀鑛民今歲歲取洗之蜀亦大將軍鎮之漆藥蜜所出也大將軍費禕葬此山大姓葬此者多

白水縣有關尉故州牧璋將楊懷高沛守也

廣漢縣 德陽縣 有劔閣道三十里至險有閣

尉桑下兵民也

武都郡本廣漢西部都尉治也 元鼎六年別為郡屬

縣九戶萬去洛一千八百七十八里東接梓潼西接天

水北接始平土地嶮峻有麻田氐僂多羌戎之民其人

半秦多勇戇出名馬牛羊漆蜜有瞿堆百頃嶮勢氐僂

常依之為叛漢世數征討之分徙其羌遠至酒泉敦

煌其攻戰壘戍處所亦多 建安二十三年先主遣將

軍雷同吳蘭平之為魏將曹洪所破殺 魏益州刺史

天水楊阜治此郡阜以濱蜀境移其氏使於汧雍及天水畧陽 建興七年丞相諸葛亮遣護軍陳戒伐之遂平武都陰平二郡還屬益州 魏將夏侯淵張郃徐晃征伐常由此郡而蜀丞相亮及魏延姜維等多從此出秦川遂荒無晉民其氏使楊濮屬魏魏遙置其郡屬蜀蜀平屬雍州 太康六年還梁州 八年氏使齊萬年反郡懼其寇晉民流徙入蜀及梁州永嘉初天水氏使楊茂搜率種人為寇保據其郡貢獻長安愍帝以胡

寇方盛欲懷來戎翟拜驃騎將軍左賢王劉曜破長
安丞相平昌公上隴據天水茂搜數饋平昌公拜茂搜
長子難敵征南將軍少子堅頭龍驤將軍種衆彊盛東
破梁州南連李雄威服羌戎時平昌公為劉曜所破陳
安作賊于時并氏使如一國茂搜死敵堅代為主數歲
曜自攻武都敵堅南奔雄至晉壽遣子為質又厚賂
雄兄晉壽守將稚曜不獲敵堅引還武都恃險驕慢攻
走雄陰平太守羅演演稚舅也稚忿恚白兄舍與雄求

征之雄使舍將稚數千人攻之時敵妻死葬於陰平舍
稚徑至下辨入武街城以深入無繼盡為氏僂所破煞
敵堅死子磐毅復代為主 咸康四年敵從弟初煞
磐毅兄弟代為主迄今 自茂搜父子之結據也通晉
家及李雄劉曜石勒石虎張駿皆稱臣奉貢受其官號
所向用其官及其年號

下辨縣郡治一曰武街

武都縣東漢水所出有大池澤

上祿縣 故道縣 河池縣 泉街縣水入沮合漢也
沮縣河池水所出東狼谷也

平樂縣 脩城縣 嘉陵縣

陰平郡本廣漢北部都尉 永平後羌虜數反遂置為
郡屬縣四戶萬去洛二千三百四十四里東接漢中南
接梓潼西接隴西北接酒泉土地山險人民剛勇多氏
叟有黑白水羌紫羌胡虜風俗所出與武都畧同 漢

安帝永初二年羌反燒郡城郡人退住白水會漢陽諸

羌反溢入漢然太守漢陽杜琦自稱將軍叛亂廣漢郡屯葭萌漢使御史大夫唐喜討琦進討羌經年不下詔賜死更遣中郎將尹就討羌亦無功諸郡太守皆屯涪

元初五年巴郡板楯軍救漢中漢中大破羌羌乃退郡復治置助郡都尉 劉先主之入漢中也爭二郡不得 建興七年諸葛亮始命陳戒平之 魏亦遙置其

郡屬雍州自景谷有步道徑江由左儋行出涪鄧艾從之伐蜀 元康六年還屬梁州 永嘉末太守王鑿粗

暴郡民毛深左騰等逐出之相率降李雄晉民盡出蜀
氏羌為楊茂搜所占

陰平縣郡治漢曰陰平道也


甸氏縣有白水出徼外入漢

武平縣有關尉自景谷有步道徑江由左僭出涪鄧艾
伐蜀道也劉主時置義守號關尉

剛氏縣涪水所出有金銀鑛

右梁州

譔曰漢沔彪炳靈光上照在天鑒為雲漢於地畫為梁
州而皇劉應之洪祚攸長蕭公之云不亦宜乎



華陽國志卷二

欽定四庫全書

史部

華陽國志卷三

四

詳校官編修臣李潢

侍讀臣孫球覆勘

總校官中書臣朱鈐

校對官助教臣胡予襄

謄錄貢生臣王時發

欽定四庫全書

華陽國志卷三

蜀志

晉常璩撰

蜀之為國肇於人皇與巴同園至黃帝為其子昌意娶
蜀山氏之女生子高陽是為帝嚳封其支庶於蜀世為
侯伯歷夏商周武王伐紂蜀與焉其地東接於巴南接
於越北與秦分西奄峨嵋地稱天府原曰華陽故其精

靈則井絡垂耀江漢遵流河圖括地象曰岷山之下為
井絡帝以會昌神以建福夏書曰岷山導江東別為沱
泉源深盛為四瀆之首而分為九江其實則有璧玉金
銀珠碧銅鐵鉛錫赭堊錦繡麝犀象氈毼丹黃空青
桑漆麻紵之饒滇獠竇棘僮僕六百之富其卦值坤故
多斑綵文章其辰值未故尚滋味德在少昊故好辛香
星應輿鬼故君子精敏小人鬼黠與秦同分故多悍勇
在詩文王之化被乎江漢之域秦豳同詠故有夏聲也

其山林澤漁園圃果瓜四節代熟靡不有焉 有周
之世限以秦巴雖奉王職不得與春秋盟會君長莫同
書軌 周失綱紀蜀先稱王有蜀侯蠶叢其目縱始稱
王死作石棺石椁國人從之故俗以石棺椁為縱目人
冢也 次王曰栢灌次王曰魚鳧魚鳧王田於湔山忽
得仙道蜀人思之為立祠 後有王曰杜宇教民務農
一號杜主時朱提有梁氏女利遊江源宇悅之納以為
妃移治郫邑或治瞿上 七國稱王杜宇稱帝號曰望

帝更名蒲卑自以功德高諸王乃以褒斜為前門熊耳
靈關為後戶玉壘峨眉為城郭江潛綿洛為池澤以汶
山為畜牧南中為園苑會有水災其相開明決玉壘山
以除水害帝遂委以政事法堯舜禪授之義遂禪位於
開明帝升西山隱焉時適二月子鵲鳥鳴故蜀人悲子
鵲鳥鳴也巴亦化其教而力農務迄今巴蜀民農時先
祀杜主君 開明位號曰叢帝叢帝生盧帝盧帝攻秦
至雍生保子帝 帝攻青衣雄張獠棘九世有開明帝

始立宗廟以酒曰醴樂曰荆人尚赤帝稱王時蜀有五
丁力士能移山舉萬鈞每王薨輒立大石長三丈重千
鈞為墓志今石笋是也號曰笋里未有謚列但以五色
為主故其廟稱青赤黑黃白帝也 開明王自夢廓移
乃徙治成都 周顯王之世蜀王有褒漢之地因獵谷
中與秦惠王遇惠王以金一笥遺蜀王王報珍玩之物
物化為土惠王怒羣臣賀曰天奉我矣王將得蜀土地
惠王喜乃作石牛五頭朝瀾金其後曰牛便金有養卒

百人蜀人悅之使使請石牛惠王許之乃遣五丁迎石牛既不便金怒遣還之乃嘲秦人曰東方牧犢兒秦人笑之曰吾雖牧犢當得蜀也武都有一丈夫化為女子美而豔蓋山精也蜀王納為妃不習水土欲去王必留之乃為東平之歌以樂之無幾物故蜀王哀之乃遣五丁之武都擔土為妃作冢蓋地數畝高七丈上有石鏡今成都北角武擔是也後王悲悼作史邪歌龍歸之曲其親理作冢者皆立方石以志其墓成都縣內有一方

折石圍可六尺長三丈許去城北六十里曰毗橋亦有一折石亦如之長老傳言丁士擔土擔也公孫述時武擔石折故治中從事任文公歎曰噫西方智士死吾其應之歲中卒 周顯王二十二年蜀侯使朝秦秦惠王數以美女進蜀王感之故朝焉惠王知蜀王好色許嫁五女於蜀蜀遣五丁迎之還到梓潼見一大蛇入穴中一人攬其尾掣之不禁至五人相助大呼扯蛇山崩時壓殺五人及秦五女并將從而山分為五嶺直頂上有

平石蜀王痛傷乃登之因命曰五婦冢山川平石上為望婦塚作思妻臺今其山或名五丁冢 蜀王別封弟葭萌於漢中號苴侯命其邑曰葭萌焉苴侯與巴王為好巴與蜀讐言故蜀王怒伐苴侯苴侯奔巴求救於秦秦惠王方欲謀楚羣臣議曰夫蜀西僻之國戎狄為鄰不如伐楚司馬錯中尉田真黃曰蜀有桀紂之亂其國富饒得其布帛金銀足給軍用水通于楚有巴之勁卒浮大船船以東向楚楚地可得得蜀則得楚楚亡則天下

并矣惠王曰善 周慎王五年秋秦大夫張儀司馬錯
都尉墨等從石牛道伐蜀蜀王自於葭萌拒之敗績王
遜走至武陽為秦軍所害其傅相及太子退至逢鄉死
於白鹿山開明氏遂亡凡王蜀十二世 冬十月蜀平
司馬錯等因取苴與巴焉 周赧王元年秦惠王封子
通國為蜀侯以陳壯為相置巴郡以張若為蜀國守戎
伯尚強乃移秦民萬家實之 三年分巴蜀置漢中郡
六年陳壯反殺蜀侯通國秦遣庶長甘茂張儀司馬

錯復伐蜀誅陳壯 七年封子暉為蜀侯司馬錯率巴蜀衆十萬大船船萬艘米六百萬斛浮江伐楚取商於之地為黔中郡 五年惠王二十七年儀與若城成都周迴十二里高七丈郾城周迴七里高六丈臨邛城周迴六里高五丈造作下倉上皆有屋而置觀樓射圃成都縣本治赤里街若徙置少城內城營廣府舍置鹽鐵市官并長丞脩整里闔市張列肆與咸陽同制其築城取土去城十里因以養魚今萬歲池是也惠王二十

七年也 城北又有龍壩池城東有千秋池城西有柳池冬夏不竭其園囿因之平陽山亦有池澤蜀之漁畝之地也 赧王十四年蜀侯惲祭山川獻饋於秦孝文王惲後母害其寵加毒以進王王將嘗之後母曰饋從二千里來當試之王與近臣近臣即斃文王大怒遣司馬錯賜惲劔使自裁惲懼夫婦自殺秦誅其臣郎中令嬰等二十七人蜀人葬惲郭外 十五年王封其子綰為蜀侯十七年聞惲無罪寃死使使迎喪入葬之郭內

初則炎旱三月後又霖雨七月車溺不得行喪車至城北門忽陷入地中蜀人因名北門曰咸陽門為蜀侯暉立祠其神有靈能興雲致雨水旱禱之三十年疑蜀侯綰反王復誅之但置蜀守張若因取笮及其江南地焉周滅後秦孝文王以李冰為蜀守冰能知天文地理謂汶山為天彭門乃至湔及縣見兩山對如闕因號天彭闕髣髴若見神遂從水上立祀三所祭用三牲珪璧沉瀆漢興數使使者祭之冰乃壅江作壩穿郫江檢

江別支流雙過郡下以行舟船岷山多梓栢大竹頽隨
水流坐致材木功省用饒又溉灌三郡開稻田於是蜀
沃野千里號為陸海旱則引水浸潤雨則杜塞水門故
記曰水旱從人不知饑饉時無荒年天下謂之天府也
外作石犀五頭以厭水精穿石犀溪於江南命曰犀牛
里後轉為耕牛二頭一在府市市橋門今所謂石牛門
是也一在淵中乃自湔堰上分穿羊摩江灌江西於
玉女房下自涉郵作三石人立三水中與江神要水竭

不至足盛不沒肩時青衣有沫水出蒙山下伏行地中
會江南安觸山脇溷崖水脈漂疾破害舟船歷代患之
永發卒鑿平溷崖通正水道或曰永鑿崖時水神怒永
乃操刀入水中與神鬪迄今蒙福 棘道有故蜀王兵
闌亦有神作大灘江中其崖漸峻不可鑿乃積薪燒之
故其處懸崖有赤白五色 永又通窄通汶井江徑臨
邛與蒙溪分水白木江會武陽天社山下合江又導洛
通山洛水或出瀑口經什邡郫別江會新都大渡 又

有綿水出紫巖山經綿竹入洛東流過資中會江陽皆
溉灌稻田膏潤稼穡是以蜀川人稱耶繁曰膏腴綿洛
為浸沃也 又識齊水脈穿廣都鹽井諸陂池蜀於是
盛有養生之饒焉 漢祖自漢中出三秦伐楚蕭何發
蜀漢米萬船而給助軍糧收其精銳以補傷疾雖王有
巴蜀南中不賓也 高祖六年始分置廣漢郡 高后
六年城棘道開青衣孝文帝末年以廬江文翁為蜀守
穿湔江口溉灌繁田千七百頃是時世平道治民物阜

康承秦之後學校陵夷俗好文刻翁乃立學選吏子弟就學遣雋士張叔等十八人東詣博士受七經還以教授學徒鱗萃蜀學比於齊魯巴漢亦立文學孝景帝嘉之令天下郡國皆立文學因翁倡其教蜀為之始也

孝武帝嘗徵入叔為博士叔明天文灾異始作春秋章句官至侍中揚州刺史 元光四年始置蜀四部都尉 元鼎二年立成都十八郭於是郡縣多城觀矣 六年分廣漢置犍為郡元封元年分犍為置牂牁郡

二年分牂牁置益州郡六年以廣漢西部蜀南部為越
雋郡北部冉龐為汶山郡邛笮為沈黎郡合置二十餘
縣 天漢四年罷沈黎置兩部都尉一治旌牛主外羌
一治青衣主漢民 孝宣帝地節三年罷汶山郡置北
部都尉 時又穿臨邛蒲江鹽井二十所增置鹽鐵官
蜀自漢興至乎哀平皇德隆熙牧守仁明宣德立教
風雅英偉之士命世挺生感於帝思於是璽書交馳於
斜谷之南玉帛踐乎梁益之鄉而西秀彥盛或龍飛紫

闔允陟璿璣或盤桓利居經綸皓素故司馬相如耀文
上京揚子雲齊聖廣淵嚴君平經德秉哲王子淵才高
名儻李仲元湛然岳立林翁孺訓誥玄遠何君公謨明
彌諧王延世著勲河平其次楊壯何顯得意之徒恂恂
焉斯蓋華岷之靈標江漢之精華也故益州刺史王褒
悅之命王褒作中和頌令胄子作鹿鳴聲歌之以上孝
宣帝帝曰此盛德之事朕何以堪之即拜為郎 降及
建武以後爰迄靈獻文化彌純道德彌臻趙志伯三遷

台衡子柔兄弟相繼元輔司空張公宣融皇極太常仲
經為天下材英廣陵太守張文紀號天下整理武陵太
守杜伯持能決天下所疑王稚子震名華夏常茂尼流
芳京尹其次張俊秦宓英辯博通董扶楊厚究知天文
任定祖訓徒同風洙泗其孝悌則有姜詩感物寤靈禽
堅精動殊俗隗通石橫中流吳順赤烏來巢其忠貞則
王皓隕身不顧朱遵絆馬必死王累懸頸州門張任守
節故主其淑媛則有元常紀常程玦及吳凡先絡耶之

二姚殷氏兩女趙公夫人自時厥後龍宗有鱗鳳集有翼搢紳邵右之疇比肩而進世載其美是以四方述作有志者莫不仰其高風範其儀則擅名八區為世師表矣其忠臣孝子烈士貞女不勝詠述雖魯之詠洙泗齊之禮稷下未足尚也故漢徵八士蜀有四焉然秦惠文始皇克定六國輒徙其豪俠於蜀資我豐王家有鹽銅之利戶專山川之材居給人足以富相尚故工商致結駟連騎豪族服王侯美衣娶嫁設太牢之厨饕歸女有

百兩之徒車送葬必高墳瓦椁祭奠而羊豕夕牲贈襚兼加贈賻過禮此其所失原其由來染秦化故也若卓王孫家僮千數程鄭各八百人而郗公從禽巷無行人簫鼓歌吹擊鐘肆懸富侔公室豪過田文漢家食貨以為稱首蓋亦地沃土豐奢侈不期而至也

蜀郡州治屬縣五戶漢二十七萬晉六萬五千去洛三千一百二十里東接廣漢北接汶山西接漢嘉犍為

州治大城 郡治少城西南兩江有七橋直西門郫江

中沖治橋西南石牛門曰市橋下石犀所潛淵中也城南曰江橋南渡流曰萬里橋西上曰夷里橋上曰窄橋橋從沖治橋西出折曰長昇橋耶江上西有永平橋長老傳言李永造七橋上應七星故世祖謂吳漢曰安軍宜在七星間城北十里有昇僊橋有送客觀司馬相如初入長安題市門曰不乘赤車駟馬不過汝下也其耶西上有永平橋於是江衆多作橋故蜀立里多以橋為名其大江自湔堰下至犍為有五津始曰白華津

二曰里津三曰江首津四曰涉頭津劉璋時召東州
民居此改曰東州頭五曰江南津入犍為有漢安橋玉
津東沮津津亦七 始文翁立文學精舍講堂作石室
一作玉室在城南永初後堂遇火太守陳留高朕更修
立又增造二石室州奪郡文學為州學郡更於夷里橋
南岸道東邊起文學有女牆其道西城故錦官也錦江
織錦濯其中則鮮明濯他江則不好故命曰錦里也

西又有車官城其城東西南北皆有軍營壘城其郡四

出大道道實二十里有衢今言十八里者昔蜀王女未嫁年二十七王哀悼不忍言二十故言十八也王女墓在城北今王女陌是也 其太守著德垂績者前漢莫聞建武以來有第五倫廉范叔度特垂惠愛百姓歌之曰廉叔度來何暮來時我單衣去時重五袴其後漢中趙瑤自扶風太守來之郡司空張溫謂曰第五伯魚從蜀郡為司空今掃吾第以待足下瑤換廣漢陳留高朕亦播文教大尉趙公初為九卿適子甯還蜀朕命為文

學撰鄉俗記亦能屈士如此廣漢王商捷為楊洪比皆見
詠懷 及晉建西夷府太守多遷為西夷校尉亦遷益
州刺史

成都縣郡治有十二鄉五部尉漢戶七萬晉三萬七千
名難治時廣漢馮顥為令而太守京兆劉宣不奉法令
顥奏之立文學學徒八百人實戶口萬八千開稻田百
頃治蹟尤異後有廣漢劉龐為令大姓恣縱諸趙倚公
故多犯法濮陽太守趙子真父子強橫龐治其罪莫不

震肅郡民陽伯侯奢侈大起塚營因龐為郡令伯侯遂徙占成都龐復為成都豪右敬服 有蜀侯祠大姓有柳杜張趙郭楊氏豪富先有程鄭邠公後有郭子平奢豪楊伯侯兄弟

邛縣郡西北六十里冠冕大姓何羅郭氏

繁縣郡北九十里有泉水稻田三張為甲族

江原縣郡西渡大江濱文井江去郡一百二十里有青城山稱江祠 安漢上下朱邑出好麻黃潤細布有羌

筒盛小亭有好稻田 東方常氏為大姓文井上有守
捉三十里上有天馬祠

臨邛縣郡西南二百里本有邛民秦始皇從上郡實之
有布濮水從布濮來合火井江有火井夜時光映上昭
民欲其火光以家火投之頃許如雷聲火焰出通耀數
十里以竹筒盛其光藏之可拽行終日不滅也井有二
水取井火煮之一斛水得五斗鹽家火煮之得無幾也
有古石山有石鑛大如蒜子火燒合之成流支鐵甚剛

因置鐵官有鐵祖廟祠漢文帝時以鐵銅賜侍郎鄧通
通假民卓王孫歲取千足故王孫貨累巨萬億鄧通錢
亦盡天下王孫女文君能鼓琴時有司馬長卿者臨邛
令王吉與之遊王孫家文君因奔長卿漢世縣民陳
立歷巴郡牂牁天水太守有異政陳氏劉氏為大姓冠
蓋也

廣都縣郡西三十里元朔二年置有鹽井漁田之饒大
豪馮氏有魚池鹽井縣凡有小井十數所及漁田之饒

江有魯漕梁山有鐵鑛江西有安稻田穿山崖過水二十里漢時縣民朱辰字元燕為巴郡太守甚著德惠辰卒官郡獮民北送及墓獮蜚鼓刀辟踊感動路人於是葬所草木頃許皆做之曲折迄今蜀人莫不歎辰之德靈為之感應今朱氏為首族也

成都市官本有長建武十八年省

蜀郡太康初屬王國改號曰成都內史王改封乃復舊

廣漢郡高帝六年置屬縣八漢戶十七萬晉四萬去洛

三千里南去成都百二十里西接汶山北接梓潼東接
巴郡本治繩鄉安帝永和中陰平漢中羌反元初二年
移涪後治雒城王莽改曰就都公孫述名曰子同益
州以蜀郡廣漢犍為三蜀土地沃美人士俊又為一州
稱望然漢選蜀郡廣漢太守每重德高俊故前有趙護
第五伯魚後有蔡陳表章禮物殊於諸郡其太守著功
德者有劉感孫賓蔡陳寵伯魚自郡徑遷司徒寵亦至
三公而祿諷尹睦鮮于定趙瑤皆公望也薛鴻輩卿佐

也而許靖亦為上公及何祇常閤皆有稱望以處州中
益州恒治此郡初平中益州牧劉焉自綿竹移雒縣城
築闕門云其地不王乃留孫脩據之 建安十八年劉
先主自涪攻圍且一年軍師龐統中流矢死先主痛惜
言則涕泣廣漢太守南陽張存曰統雖可惜違大雅之
體先主怒曰統殺身成仁非仁者乎即免存官 十九
年拔雒城援襄陽馬良書詒諸葛亮曰承雒城已下尊
兄配業先國魄兆見矣時州或治成都時復治雒為蜀

淵府

雒縣郡治汎鄉 有孝子姜詩田地宅姓族有鐔李郭
翟氏

綿竹縣劉焉初所治綿與雒各出稻稼畝收三十斛有
至十五斛漢時任安定祖以儒學教號侔洙泗有多士
秦杜為首族也

什邡縣山出好茶楊氏為大姓美田有鹽井

新都縣蜀以成都廣都新都為三都號名城有金堂山

水通于巴漢時五倉名萬安倉有棗魚梁多名士有楊厚董扶又有四姓馬史汝鄭者也

五城縣郡東南有水通于巴漢時置五倉發五縣民尉部主之後因以為縣出龍骨云龍升其山值天門閉不達墮死於此後沒地中故掘取得龍骨

郵縣有山原田富國鹽井濮出好棗宜君山出麋尾特好入貢大姓王李氏又有高馬家世常部曲蜀時高勝馬泰皆叛伏誅

廣漢縣有山原田蜀時彭義有雋才晉世改號令德故
二姓為甲族也

德陽縣有青石祠山原肥沃有澤漁之利士女貞孝望
山樂水土地易為生事車騎將軍鄧芝雅有終焉之思
後遂葬其山太守夏侯慕時古濮為功曹康古袁氏為
四姓大族之甲者也

劉氏延熙中分廣漢四縣置東廣漢郡咸熙初省泰始
末又分置新都郡太康省末年又置蜀王國蜀郡常璿

為內史永嘉末省

犍為郡孝武建元六年置時治犍縣十二漢戶十萬

犍故犍為地是也犍有犍山見保乾圖 武帝初欲開

南中令蜀通犍青衣道是元年犍道令通之費功無成

百姓愁怨司馬相如諷諭之使者唐蒙將南入以道不

通執令將斬之令歎曰忝官益土恨不見成都市蒙即

令送成都市而殺之蒙乃斬石通閣道故世為諺曰思

都郵斬令頭云後蒙為都尉治南夷道 元光五年郡

移治南廣 四年益州刺史任安城武陽 孝昭元年
郡治犍道後遂徙武陽至晉屬縣五戶二萬去洛三千
二百七十里東接江陽南接朱提北接蜀郡西接廣漢
王喬升其北山彭祖家其彭蒙白虎仁於廣德寶鼎見
於江溉 綏和五年又上寶磬十六劉向以為美化所
降用立辟雍而士多仁孝女性貞專王莽改曰西順郡
人不會更始都南陽遠奉貢職及公孫述有蜀郡拒守
述伐之郡功曹朱遵逆戰衆寡不敵遵絆馬死戰遂為

述所并而任君業閉戶費貽素隱光武帝嘉之曰士大夫之郡也郡去成都百五十里渡大江昔人作大橋曰漢安橋廣一里半每秋夏水盛斷絕歲歲修理百姓苦之建安二十一年太守南陽李嚴乃鑿天社山尋江通車道省橋梁三津吏民悅之嚴因更造起府寺觀壯麗為一州勝宇二十四年黃龍見武陽赤水九日蜀以劉氏瑞應其太守漢興以來鮮有顯者

武陽縣郡治有王喬彭祖祠蒲江大堰灌郡下六門有

朱遵祠山出鐵及白玉特多大姓有七陽五李諸姓十二也

南安縣郡東四百里治青衣江會縣既有名灘一曰雷垣二曰鹽概李冰所平也有柑橘官社漢有鹽井南安武陽皆出名茶多陂池西有熊耳南有峨眉山山去縣八十里孔子地圖言有仙藥漢武帝遣使者祭之欲致其藥不能得有四姓能宣謝審五大族楊費又有信士呂孟貞紀至行也

棘道縣在南安東四百里拒郡百里高后六年城之治
馬湖江會水通越舊舊本有棘人故秦紀言棘童之富
漢民多漸斥徙之有荔支薑蒟濱江有兵欄李永所燒
之崖有五色赤白映水玄黃魚從楚來至此而止畏崖
映水也有韓原素祠又有孝子隗通為母汲江裔水天
為出平石生江中今石在馬湖江而孝子吳順養母赤
鳥巢其門崩容江出好磨石崩江多魚害民失在於徵
巫好鬼妖大姓吳隗又有楚石薛相者

牛鞞縣受新都江去郡三百里元鼎二年置相陽明鹽井程韓氏為冠蓋之族資中縣受牛鞞江也

江陽郡先有王延世著勲河平後有董鈞為漢定禮王董張趙為四族二縣在中多山田少種稻之地

本犍為枝江都尉建安十八年置郡漢安程徵石謙白州牧劉璋求立郡璋聽之以都尉廣漢成存為太守屬縣四戶五千去洛四千八十里東接巴郡南接牂牁西接廣漢犍為北接廣漢有荔支巴菽桃枝蒟給橙俗好

文刻少儒學多樸野蓋天性也

江陽縣郡治江雒會有方山蘭祠江中有大闕小闕季春黃龍堆沒闕即平昔云世祖微時過江陽有一子望氣者曰江陽有貴兒氣王莽求之縣人殺之後世祖為子立祠謫江陽民不使冠帶者數世有富義鹽井又郡下百二十里者曰伯塗魚梁六伯氏女為塗氏婦造此梁四姓王孫程鄭八族又有魏趙先周也

漢安縣郡東五百里土地雖迫山水特美好宜蠶桑有

鹽井魚池以百數家家有焉一郡豐沃四姓程石姚郭八族張李李趙輩而程石傑立郡常秉議論選之

符縣郡東二百里元鼎二年置治安樂水會東接巴蜀樂城南水通平羌暨縣永建元年十二月縣長趙祉遣吏先尼和拜檄巴蜀守過成瑞灘死子賢求喪不得女絡年二十五迺分金珠作二錦囊繫兒頭下至二年二月十五日女絡乃乘小船至父沒所哀哭自沉見夢告賢曰至二十一日與父尸俱出至日父子浮出縣言郡

太守蕭登高之上尚書遣戶曹掾為之立碑人為語曰
符有先絡棘道張帛求其夫天下無有其偶者矣

新樂縣郡西二百八十里元康五年置西楚棘道有鹽

井大姓魏呂氏

西楚棘道

汶山郡本蜀郡北部冉駝都尉孝武元封四年置舊屬
縣八戶二十五萬去洛三千四百六十三里東接蜀郡

南接漢嘉西接涼州酒泉北接陰平有六夷羌胡羌虜
白蘭蚘九種之戎牛馬旄氍斑罽青頓筆毼羊羖之屬

特多雜藥名香土地剛鹵不宜五穀惟種麥而多冰寒
盛夏凝凍不釋故夷人冬則避寒入蜀庸賃自食夏則
避暑反落歲以為常故蜀人謂之作五百石子也 宣
帝地節元年武都白馬羌反使者駱武平之因拜越雋
太守迎者如雲後蜀郡趙溫亦著治績故王莽遣任貴
為鎮戍大尹守之 自建武後數叛 章武三年越雋
叟大帥高定元稱王恣睢遣都督李承之然將軍梓潼
焦璜破沒郡土丞相亮遣越雋太守龔祿住安上縣遙

領太守安上去郡八百里有名而已建興三年蜀安南
將軍馬忠率越鴛郡夷郡夷剛狼皆鴟視忠率越鴛太
守張嶷將所領之郡誘殺蘇祈邑君久逢及其弟隗渠
等懷集種落威信允著諸種漸服又斬斯都耆帥李承
之首乃手殺焦璜龔祿者也又討叛鄙降夷人安種落
蠻夷率服嶷始以郡郭宇頽更築小塢居之

舊本記此段訛舛不可重叙姑考事之本末畧加整
頓刻之

延熙二年乃還舊郡更城郡城夷人男女莫不致力興復七縣疑遷復後頗奸軌雖有四部斯兒及七營軍不足固守乃置赤甲北軍二牙門及斯兒督軍中堅衛夷徽

邛都縣郡治因邛邑名也邛之初有七部後為七部營軍又有四部斯兒南山出銅有溫泉穴冬夏熱其溫可湯雞豚下流治疾病餘多惡水水神護之不可污穢及沈亂髮照面則使人被惡疾一郡通云然

臺登縣有孫水一曰白沙江入馬湖水山有砮石火燒成鐵剛利禹貢厥賦砮是也又有漆漢末夷皆有之嶷

取焉

張嶷也

關縣故邛人邑邛都接寒關今省

蘇示縣漢末夷王及弟隗渠數偕叛以服諸種張嶷先殺王弟隗渠又叛遁入西徼遣親信二人使嶷嶷知奸計以重賂使使殺渠渠死夷徼肅清縣晉省

會無縣路通寧州渡瀘得住狼縣故濮人邑也今有濮

人家冢不閉戶其穴多有碧珠人不可取取之不祥有天馬河馬日千里後死於蜀葬江原小亭今天馬冢是也縣有天馬祠初民家馬牧山下或產駿駒云天馬子也今其天馬徑厥迹存焉河中有銅船今以羊祀之可取河中見存土地時產犀牛山色青碧

大笮縣漢末省也

定笮縣笮笮夷也汶山曰夷南中曰昆明漢嘉越嶲曰笮蜀曰邛皆夷種也縣在郡西渡瀘水賓剛徼白摩沙

夷有鹽池積薪以齊水灌而後焚之成鹽漢末夷皆錮之張嶷往爭夷帥岑槃木明不肯服嶷禽撻然之厚賞賜餘類皆安官迄有之北沙河是

三縫縣一曰小會無音三播

音三播字疑誤

通道寧州渡瀘得

蜻蛉縣有長谷石時坪中有石豬子母數千頭長老傳言夷昔牧豬於此一朝豬化為石迄今夷不敢牧於此
卑水縣去郡三百里水流通馬湖

潛街縣漢末置晉初省

安上縣 馬湖縣水通犍道入江晉初省

右益州漢初統郡五後漸分建蜀郡及巴郡又分為五郡廣漢漢中犍為為四郡又開益州五郡合二十五郡及寧州梁州建復增七郡蜀於是有州四十二郡一百九十六縣州分後益州凡新舊郡九縣四十八戶夷晉二十四萬

譔曰蜀之為邦天文井絡輝其上地理岷嶓鎮其域五岳華山表其陽四瀆則汶江出其徼故上聖則大禹生

其鄉媾姻則黃帝媾其女顯族大賢彭祖育其山列仙
王喬升其固而寶鼎輝光於中流離龍仁虎躍乎淵陵
開闢及漢國富民殷府腐穀帛家蘊畜積雅頌之聲充
塞天衢中穆之詠侔乎二南蕃衍三州土廣萬里方之
九區於斯為盛固乾坤之靈囿先王之所經緯也

華陽國志卷三